

VENDIM
Nr.50, datë 23.1.2009

**PËR DISA NDRYSHIME DHE SHTESA NË VENDIMIN NR.1, DATË 7.1.2009 TË
KËSHILLIT TË MINISTRAVE “PËR PAJISJEN, PËR HERË TË PARË, ME
LETËRNJOFTIM, TË SHTETASVE SHQIPTARË DHE PËR PERCAKTIMIN E
AFATEVE E TË MASAVE SHTRËNGUESE, PËR ATA, QË NUK APLIKOJNË
BRENDA KËTYRE AFATEVE”**

Në mbështetje të nenit 100 të Kushtetutes, të pikës 2 të nenit 179 të ligjit nr.10 019, datë 29.12.2008 “Kodi Zgjedhor i Republikës së Shqipërisë”, të neneve 1 e 3, pika 2, të ligjit nr.8952, datë 10.10.2002 “Për dokumentin e identitetit të shtetasve shqiptarë”, dhe të ligjit nr.9972, datë 28.7.2008 “Për ratifikimin e kontratës koncesionare “Për prodhimin dhe shpërndarjen e kartave të identitetit dhe të pasaportave elektronike”, ndërmjet Ministrisë së Brendshme të Republikës së Shqipërisë dhe grupimit të SAGEM Securite e Fondit Shqiptaro-Amerikan të Ndërmarrjeve”, me propozimin e Ministrit të Brendshëm, Këshilli i Ministrave

VENDOSI:

Në vendimin nr.1, datë 7.1.2009 të Këshillit të Ministrave “Për pajisjen, për herë të parë, me letërnjoftim të shtetasve shqiptarë dhe për përcaktimin e afateve e të masave shtrënguese, për ata që nuk aplikojnë brenda këtyre afateve”, bëhen këto ndryshime dhe shtesa:

1. Pika 4 e vendimit riformulohet, si më poshtë vijon:

“4. Shtetasit, të cilët janë të detyruar të pajisen me letërnjoftim, sipas pikës 3 të këtij vendimi, dhe që janë në moshën mbi 18 vjeç, në datën 28 qershor 2009, dhe nuk disponojnë pasaportë, nëse nuk pajisen me letërnjoftim deri më 15 prill 2009, nuk përfitojnë shërbimet e mëposhtme:

a) Pagesën ose shpërblimet për të gjithë personat fizikë, të punësuar në administratën dhe institucionet publike, si dhe për personat e punësuar në shoqëri, agjenci a ente shtetërore, qendrore apo vendore;

b) Pagesën apo shpërblimet për pensionistët;

c) Pagesën për ndihmë, përkrahje sociale a çdo lloj ndihme tjetër, ofruar nga institucionet publike, qendrore e vendore;

ç) Pranimin në provimet e fundvitit dhe regjistrimin në vitin shkollor/akademik pasardhës, për të gjithë ata, që ndjekin studimet në shkollat e mesme dhe të larta, për pjesëmarrësit në konkurse apo gara të ndryshme, të organizuara nga Ministria e Arsimit dhe Shkencës;

d) Pajisjen me pasaportë për jashtë shtetit;

dh) Shërbimin në zyrat e gjendjes civile, me përjashtim të regjistrimit të akteve të lindjes dhe të vdekjes, si dhe pajisjet me certifikatë, me fotografi, për aplikimin për letërnjoftim, sipas këtij vendimi;

e) Lëshimin ose rinovimin e lejeve, të autorizimeve, licencave nga organet e pushtetit qendror/vendor ndaj personave fizikë dhe përfaqësuesve ligjorë të personave juridikë;

ë) Aplikimin dhe pajisjen me certifikatë pronësie, nga zyrat e regjistrimit të pasurive të paluajtshme;

f) Aplikimin dhe lëshimin e dokumentit “Leje drejtimi automjeti” dhe kolaudimin e tyre;

g) Lëshimin e vërtetimeve dhe të dokumenteve të tjera, të ngjashme me to, nga administrata gjyqësore;

gj) Shërbimet noteriale;

h) Shpërndarjen e karburantit, pa akcizë, për fermerët;

i) Shërbimin nga zyrat e Alba-Postës.

Shërbimet e parashikuara në shkronjat “d” deri “i” nuk do të ofrohen edhe nëse shtetasi nuk ka aplikuar deri në datën 10 shkurt 2009.

2. Pas pikës 4 shtohet pika 4/1, me këtë përmbajtje:

“4/1. Procedura e aplikimit për shtetasit e tjerë, sipas pikës 3 të këtij vendimi, fillon në datën 1 prill 2009. Bëjnë përjashtim nga ky rregull shtetasit, që kanë aplikuar përpara datës 31 janar 2009, për të cilët pajisja me letërnjoftim do të vazhdojë rregullisht.”.

3. Pika 8 riformulohet, si më poshtë vijon:

“8. Drejtoria e Përgjithshme e Gjendjes Civile, në bashkëpunim me Drejtorinë e Përgjithshme të Policisë së Shtetit, u dërgon, jo më vonë se data 30 janar 2009, të gjitha bashkive/komunave/njësite bashkiake, listën përkatëse të shtetasve, sipas pikës 4 të këtij vendimi. Njësia përkatëse e bën listën publike, si dhe brenda 10 ditëve, njofton shtetasit, emrat e të cilëve janë të shënuar në listë, për të aplikuar me përparësi për letërnjoftim.

Njoftimi shoqërohet me paralajmërimin për masat shtënguese, që parashikohen sipas këtij vendimi apo akte të tjera ligjore e nënligjore, në fuqi. Pajisja me certifikatë e shtetasve, për qëllim të aplikimit për letërnjoftim, sipas shkronjës “d” të pikës 4 të këtij vendimi, nuk pengohet për asnjë shkak nga zyrat e gjendjes civile.”.

4. Pas pikës 8 shtohet pika 8/1, me këtë përmbajtje:

“8/1. Lista e shtetasve të njësisë vendore përkatëse, sipas pikës 4 të këtij vendimi, duhet të përditësohet në mënyrë periodike, si dhe të shpallet pranë zyrës së aplikimit, duke fshirë emrat e shtetasve, që kanë aplikuar. Nëse ndonjë shtetas, që nuk disponon pasaportë, nuk është përfshirë në listë, sipas pikës 4 të këtij vendimi, mund ta paraqesë kërkesën për regjistrim pranë zyrës së gjendjes civile, pasi të ketë marrë më parë vërtetimin nga Drejtoria e Policisë së Shtetit.”.

5. Pas pikës 10 shtohet pika 10/1, me këtë përmbajtje:

“10/1. Ngarkohet Ministri i Brendshëm të nxjerrë udhëzimet, për formën dhe përmbajtjen e formularit të njoftimit për shtetasit, si dhe për çdo kërkesë apo masë, që lidhet me pajisjen, me përparësi të shtetasve, sipas pikës 4 të këtij vendimi. Ministri i Brendshëm informon, në mënyrë periodike, KQZ-në dhe Këshillin e Ministrave për ecurinë e procesit të pajisjes me letërnjoftim të shtetasve, që nuk disponojnë pasaportë.”.

Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Sali Berisha